

▲函電▼

電

唐元帥致大元帥電

孫中山先生鑒頃據顧軍長品珍巧電稱前于元日派何旅海清率兵進攻合江以與黔軍聯絡刻據何旅報告已于篠日將合江攻下乘勢進攻江津等語知注奉聞繼堯叩皓印

唐元帥致大元帥電

義密我軍於自流井口敵隆昌口縣連戰克捷迭經電聞口口口口准貴陽劉督軍電我軍於文江寒刪等日由綦江進攻迭獲勝利已攻克坭場界石三百梯江迢等處要隘現正猛攻黃角丫又接趙又新等軍官電我軍已將(自流井)榮(榮縣)兵力向永川江津方面移轉分道進攻等語滇黔兩軍合力攻渝計可不日下渝特此奉聞繼堯鈐印

程海軍總長等致大元帥電

廣州孫中山先生公鑒省長一職關係地方異常重大現李省長業經去職繼任無人前省議會曾舉胡漢民先生担任斯職現更責無旁貸應照省議會原案公請胡漢民先生即日就任以重民意而維粵局程璧光李烈鈞林葆懌張開儒方聲濤吳景濂鈕永建張繼楮輔成陽漪李茂之公叩有

莫代督致大元帥電

孫中山先生鑒自黃陂被幽段賊竊政弁髦大法朋比羣奸我西南將帥不忍見民國之就隳爰舉義師用維法紀湘南舉發桂粵誓師轉戰安攸載定衡寶用兵匝月遂拔長沙王范之頑傳周之悍奔逃恐後莫撓吾鋒唐莫廣近更督師川南所向皆捷湘粵桂三省聯軍將達岳州滇黔雄師卽出渝關掃清妖孽此正其時乃二三君子懷同室操戈之戒引閹牆禦侮之言建議調停冀成和局甯人息事曷勝欽遲但我西南所爭者一爲屏斥段賊一爲懲辦禍首一爲恢復國會一爲回復黃陂之自由若黃陂必欲辭職須由正式國會解決今四者一未能行而遽議調停不獨非我諸將帥誓師起義之初心亦恐無以慰海內人民之期望榮新鋒鏑餘生飽嘗憂患素明宗旨誓貫主張現正簡練軍實召集師徒聽候巡憲指揮分途策應一日不達目的一日不能罷兵甯不知外交多事之秋內部不宜衝突亦以約法既傾國本焉託清源正本非得已也諸公既處袍澤必協進行望秉堅貞共圖匡濟佇候明教不盡依馳莫榮新叩養

張開儒致大元帥電

廣州孫大元帥鈞鑒竊以國家之興亡視乎法律之存廢以爲衡法律之存廢視乎執政之賢否以爲斷故善治國者導之以德齊之以禮使民有恥且格其次則導之以政齊之以刑民免而無恥此所以納民於軌物者也古之所謂政刑云者卽今之所謂法律也民國之屢興而中斷者卽屢殺人以爭約法而屢廢也慨自袁世凱梟獍自雄奮其私智矚視法紀謂霸王之業可以力征經營天下洪憲曇花不崇朝而

身死名裂野心者至今思之當懷然而戒心何物段祺瑞竟師踵之惟恐不及率其醜類橫行天下虺蛇其心豺虎其行暴戾恣睢肝人之肉等法律於弁髦玩元首於股掌猜賢妬能剛復獷悍會盟徐州挑釁蜀浙峻使無恥將軍率乞丐以摧殘國會招引有辯大帥假復辟以驅逐總統任嬖人以黜陟官牧寵文妖而淆亂是非籠帝孽於惟幕鴟鵂嘯聚視人命如魚肉宰割自由目護法爲叛逆依賣國者爲心腹更以集家賊不足以亡國復借外力殺戮同胞以速其亡狼戾賊心何至此極始見棄於洪憲詐瘋魔以圖後逞繼見逐於黃陂猶怙惡不悛今則惡貫盈滿神人共忿義師譴起聲罪致討衆叛親離內外夾攻而猶徊徘徊戀棧此賊真不知死所矣然萬夫所指無疾而終吾知時日之喪可立而待也第開儒與國人約者數端(一)恢復舊約法之効力以固國本(二)恢復舊國會以促成憲法(三)請黎大總統復職如黎公辭職則由國會解決(四)組織合法內閣以促進改良政治之程序(五)懲辦叛督及新舊帝黨以除禍根(六)取消清室優待條件以免死灰復燃(七)解散非法之參議院(八)反對肥私殃民一切賣國借款(九)厚卹義軍陣亡將士(十)取消逮捕民黨之僞令以上十條如有一未做到萬不能罷兵幸勿小勝卽足癡言調和一誤再誤殷鑑可憂彼繼段祺瑞而起者狼盼虎視比比皆是若不剷草除根永絕後患則小民之脂膏有限能經幾度之揭剝起兵以討逆乎夫小民之憔悴於兵燹久矣猶忍痛而不言者以人民與盜賊不兩立法律與橫暴不並行故國家不能一日無法律而法律之下不能一日容盜賊以橫行若姑息苟安養癰遺患則興兵殃民之罪浮於逆黨倍蓰矣故自辛亥以還平民政治屢次與官僚政治戰爭殺人盈野流血千里以護此數條約法而終不能戰勝者非彼之甲兵堅利於我實我惑於

調和自貽伊戚也與言及此則吾不責逆黨之狡黠反怪吾人之愚頑自禍也開儒前曾屢次通電出師討逆嗣因國會南遷開會廣州新組政府側聞國會之所在即民國正統之所在故屯兵於此以資保護一俟根基稍固即行率師北伐誓不與賊黨共戴一天賊存則開儒死開儒存則不容賊存於中土區區守心盟指河山望諸公堅持到底以圖一勞永逸之計秣馬陳詞鵠候明教張開儒叩敬印

援湘滇軍彭司令致大元帥電

孫大元帥鈞鑒國賊不誅無以謝國人國法不彰無以成國體僞總理段祺瑞乘危攘竊遽據高位侮約法宣戰媾和之權辱國會神聖立法之地跋扈自恣結叛督以脅迫總統既被罷斥藉復辟而重攪政權乃復遍布爪牙挑撥川湘假名借款藉充軍實種種罪惡聞之髮指凡有血氣誰不奮起撲殺此獠學游等忝列戎行歷應義舉不忍神聖約法爲彼破壞更不忍大好河山爲彼斷送現奉軍長李公之令督率健兒聯合桂粵義軍志在護國相繼援湘本天良之復發各勇敢以直前置生死於不顧何身家之足恤從此會師武漢先寒敵心行將直搗幽燕共梟逆首駐粵雲南護國軍援湘支隊司令官彭學游參謀長鄧元鎮副官長劉學漢秘書蕭鄒團長李文嶽陳百川張邦傑萬軍等暨全體官兵同叩

長沙劉人熙致大元帥電

孫大元帥鑒頃辱函電遠荷注存阻隔烽煙抒忱無路天相中國衆志獲申北軍今早退出林君德軒被推暫維秩序地方安甯堪慰鈞念鮮決時局及湘中善後事宜願聞偉謀藉慰景仰公如通電乞並見示

當竭愚慮冀效芻蕘人懇叩巧代印

大元帥覆唐元帥電

雲南督軍署轉行營唐元帥鑒皓電敬悉知願軍已克合江進取江津兵氣鬱奮名城屢捷此非惟勁旅
効命亦以雄麾所至足落逆膽也豈勝欣賀此時重慶之勢已搖長驅蕩滌當在指顧佇盼大捷無任神
馳孫文有

▲ 啓 事 ▼

大元帥府參軍處啟事

查本處前發給之出入證第八十四號及第二百四十九號據報業經遺失除另行補發外用特登報聲明作廢自後如持有上開號數之出入證在外招搖哄騙情事即行扭送來處定將從嚴究辦決不姑寬

▲廣告▼

○軍政府公報處廣告(一)

本公報現暫以長壽直街第四號廖球記代理發行凡內地外埠欲購閱本公報者希逕向該店定購可也此佈

本公報價目

- 一本報每日出版一號
- 二定購一月者定價大洋八角三月二元三角半年四元五角常年八元須先交報費
- 三國內及日本每號郵費半分南洋美洲各埠郵費酌加
- 四零售每號四仙

○軍政府公報處廣告(二)

啟者本公報現既出版至第十一號以本號爲止仍照前贈送自第十二號起除各行政公署及各公共團體仍繼續送閱一份外其餘各個人恕不贈送要讀諸公請致函長壽直街第四號本公報代理廖球記定購可也此佈

中華民國六年十月四日

軍政府公報處啟

○大元帥府參軍處啟事

啟者大元帥府之電話號數如左

秘書處二一零零

參軍處副官室庶務科二零四四

衛隊室二零六九

大元帥府參軍處啟

軍政府公報

廣告

十一月廿六號第廿八號

七